

四庫全書

子部

欽定四庫全書

子部

畫禪室隨筆

目錄  
卷一

詳校官庶吉士臣汪彥博

員外郎臣牛稔文覆勘

總校官原任臣王燕緒

校對官編修臣勵守謙

謄錄監生臣邵敬修

欽定四庫全書

子部十

畫禪室隨筆目錄

雜家類三

雅說之屬

卷一

論用筆

評法書

跋自書

評古帖

卷二

畫訣

畫源

題自畫

評舊畫

卷三

記事

記游

評詩

評文

卷四

雜言上

雜言下

楚中隨筆

禪悅

臣等謹案畫禪室隨筆四卷明董其昌撰其

昌字元宰松江華亭人萬厯己丑進士改庶

吉士官至禮部尚書掌詹事府事加太子太保致仕卒謚文敏事蹟具明史文苑傳其昌天才俊逸以書畫擅名人擬之米芾趙孟頫此乃所作雜記其第一卷皆論書語第二卷皆論畫語類多手蹟題跋之文而後人為編次成帙者凡所評隲頗得書畫三昧益於此道解悟甚深故談言微中洵足為藝事指南之助第三卷分記事記遊評詩評文四子部

中如記楊成以蔡經為蔡京之類頗涉輕薄  
以陸龜蒙白蓮詩為皮日休未免舛誤又其  
昌於八股最有法度故評文多談制藝亦自  
舉其所得力者言之然大致雅馴實有可採  
第四卷亦分子部四禱言上下皆小品閒文  
楚中隨筆則冊封楚王時所作並足以資檢  
核惟禪悅一門撫拾宗門餘唾推重李贄陶  
望齡諸人殊為漸染習氣然當時士大夫大

舉皆然固不足為其昌責矣乾隆四十三年

八月恭校上

總纂官

臣紀昀臣陸錫熊臣孫士毅

總校官

臣陸費墀





欽定四庫全書

畫禪室隨筆卷一

明 董其昌 撰

論用筆

米海嶽書無垂不縮無往不收此八字真言無等等呪也然須結字得勢海嶽自謂集古字蓋於結字最留意比其晚年始自出新思耳學米書者惟吳琚絕肖黃華楞寮一支半節雖虎兒亦不似也

作書所最忌者位置等勻且如一字中須有收有放有精神相挽處王大令之書從無左右並頭者右軍如鳳翥鸞翔似竒反正米元章謂大年千丈觀其有偏側之勢出二王外此皆言布置不當平勻當長短錯綜疎密相間也

作書之法在能放縱又能攢促每一字中失此兩竅便如黑夜獨行全是魔道矣

余嘗題永師千文後曰作書須提得筆起自為起自為

結不可信筆後代人作書皆信筆耳信筆二字最當  
玩味吾所云須懸腕須正鋒者皆為破信筆之病也  
東坡書筆俱重落米襄陽謂之畫字此言有信筆處  
耳

筆畫中須直不得輕易偏軟

捉筆時須定宗旨若泛泛塗抹書道不成形像用筆使  
人望而知其為某書不嫌說定法也

作書最要泯沒稜痕不使筆筆在紙素成板刻樣東坡

詩論書法云天真爛漫是吾師此一句骨髓也

書道只在巧妙二字拙則直率而無化境矣

顏平原屋漏痕折釵股謂欲藏鋒後人遂以墨猪當之  
皆成偃筆癡人前不得說夢欲知屋漏痕折釵股於  
圓熟求之未可朝執筆而暮合轍也

藥山看經曰圖取遮眼若汝曹看牛皮也須穿今人看  
古帖皆穿牛皮之喻也古人神氣淋漓翰墨間妙處  
在隨意所如自成體勢故為作者字如算子便不是

書謂說定法也

予學書三十年悟得書法而不能實證者在自起自倒  
自收自束處耳過此關即右軍父子亦無奈何也轉  
左側右乃右軍字勢所謂跡似奇而反正者世人不  
能解也

書家好觀閣帖此正是病蓋王著輩絕不識晉唐人筆  
意專得其形故多正局字須奇宕瀟灑時出新致以  
奇為正不主故常此趙吳興所未嘗夢見者惟米癡

能會其趣耳今當以王僧虔王徽之陶隱居大令帖  
幾種為宗餘俱不必學

古人作書必不作正局蓋以奇為正此趙吳興所以不  
入晉唐門室也蘭亭非不正其縱宕用筆處無迹可  
尋若形模相似轉去之遠柳公權云筆正須善學柳  
下惠者叅之余學書三十年見此意耳

字之巧處在用筆尤在用墨然非多見古人真蹟不足  
與語及此竅也

發筆處便要提得筆起不使其自偃乃是千古不傳語  
蓋用筆之難難在遒勁而遒勁非是怒張木強之謂  
乃如大力人通身是力倒輒能起此惟褚河南虞永  
興行書得之須悟後始肯余言也

用墨須使有潤不可使其枯燥尤忌穠肥肥則大惡道  
矣

作書須提得筆起不可信筆蓋信筆則其波畫皆無力  
提得筆起則一轉一束處皆有主宰轉束二字書家

妙訣也今人只是筆作主未嘗運筆

書楷當以黃庭懷素為宗不可得則宗女史箴行書以  
米元章顏魯公為宗草以十七帖為宗

評法書

余十七歲時學書初學顏魯公多寶塔稍去而之鍾王  
得其皮耳更二十年學宋人乃得其解處

文待詔學智永千文盡態極妍則有之得神得髓槩乎  
其未有聞也嘗見吳興臨智永故當勝



趙吳興跋蘭亭序云與丙舍帖絕相似丙舍乃鍾元常書世所傳者右軍臨本耳

東坡先生書深得徐季海骨力此為文湖州洋嶼詩帖余少時學之今猶能寫或微有合處耳

米元章嘗奉道君詔作小楷千字欲如黃庭體米自跋云少學顏行至于小楷了不留意蓋宋人書多以平原為宗如山谷東坡是也惟蔡君謨少變耳吾嘗評米書以為宋朝第一畢竟出東坡之上山谷直以品

勝然非專門名家也

東坡先生書世謂其學徐浩以予觀之乃出于王僧虔耳但坡云用其結體而中有偃筆又雜以顏平原法故世人不知其所自來即米顛書自率更得之晚年一變有冰寒于水之奇書家未有學古而不變者也楊景度書自顏尚書懷素得筆而溢為奇怪無五代衰於之氣宋書黃米皆宗之書譜曰既得平正須追險絕景度之謂也

古人論書以章法為一大事蓋所謂行間茂密是也余見米癡小楷作西園雅集圖記是紈扇其直如弦此必非有象迹乃平日留意章法耳右軍蘭亭叙章法為古今第一其字皆映帶而生或小或大隨手所如皆入法則所以為神品也

素師書本畫法類僧巨然巨然為北苑流亞素師則張長史後一人也高閑而下益趨俗怪不復存山陰矩度矣

蘭亭出唐名賢手摹各叅襟自家習氣歐之瘦褚之肥  
于右軍本來面目不無增損政如仁智自生妄見耳  
此本定從真蹟心眼相印可以稱量諸家稊帖乃神  
物也

晉唐人結字須一一錄出時常叅取此最關要吾鄉陸  
儼山先生作書雖率爾應酬皆不苟且常曰即此便  
是寫字時須用敬也吾每服膺斯言而作書不能不  
揀擇或間窓游戲都有著精神處惟應酬作荅皆率

易苟完此最是病今後遇筆研便當起矜莊想古人  
無一筆不怕千載後人指摘故能成名因地不真果  
招紆曲未有精神不在傳遠而倖能不朽者也吾于  
書似可直接趙文敏第少生耳而子昂之熟又不如  
吾有秀潤之氣惟不能多書以此讓吳興一籌畫則  
具體而微要亦三百年來一具眼人也

吾學書在十七歲時先是吾家仲子伯長名傳緒與余  
同試于郡郡守江西衷洪溪以余書拙置第二自是

始發憤臨池矣初師顏平原多寶塔又改學虞永興  
以為唐書不如晉魏遂倣黃庭經及鍾元常宣示表  
力命表還示帖丙舍帖凡三年自謂逼古不復以文  
徵仲祝希喆置之眼角乃于書家之神理實未有人  
處徒守格轍耳比游嘉興得盡觀項子京家藏真蹟  
又見右軍官奴帖于金陵方悟從前妄自標許譬如  
香巖和尚一經洞山問倒願一生做粥飯僧余亦願  
焚筆研矣然自此漸有小得今將二十七年猶作隨

波逐浪書家翰墨小道其難如何況學道乎

吾鄉陸宮詹以書名家雖率爾作應酬字俱不苟且曰  
即此便是學字何得放過陸公書類趙吳興實從北  
海入有客每稱公似趙者公曰吾與同學李北海耳  
吾鄉莫中江方伯書學右軍自謂得之聖教序然與聖  
教序體小異其沉着逼古處當代名公未能或之先  
也予每詢其所由公謙遜不肯應及余已卯試留都  
見王右軍官奴帖真蹟儼然莫公書始知公深于二

王其子雲卿亦工書

書家有自神其說以右軍感胎仙傳筆法大令得白雲先生口授者此皆妄人附托語天上雖有神僊能知義獻為誰乎

呂純陽書為神仙中表表者今所見若東老詩乃類張長史又云題黃鶴樓似李北海仙書尚以名家為師如此孫虔禮曰妙擬神仙余謂實過之無不及也昔人以翰墨為不朽事然亦有遇不遇有竅下竅傳者



有勤一生而學之異世不聞聲響者有為後人相傾  
餘子悠悠隨巨手譏評以致聲價頓減者有經名人  
表章一時慕效大擅墨池之譽者此亦有運命存焉  
總之欲造極處使精神不可磨沒所謂神品以吾神  
所著故也何獨書道凡事皆爾

趙吳興大近唐人蘇長公天骨俊逸是晉宋間規格也  
學書者能辨此方可執筆臨摹否則紙成堆筆成塚  
終落狐禪耳

米元章云吾書無王右軍一點俗氣乃其收王畧帖何珍重如是又云見文皇真論使人氣懾不能臨寫真英雄欺人哉然自唐以後未有能過元章書者雖趙文敏亦于元章歎服曰今人去古遠矣余嘗見趙吳興作米書一冊在吏部司務蔣行義家頗得襄陽法今海內能為襄陽書者絕少

宋時有人以黃素織烏絲界道三丈成卷誠子孫相傳待書足名世者方以請書凡四傳而遇元章元章自

任腕有羲之鬼不復讓也

明神宗帝天藻飛翔雅好書法每攜獻之鴨頭丸帖虞  
世南臨樂毅論米芾文賦以自隨予聞之中書舍人  
趙士禎言如此因攷右軍曾書文賦褚河南亦有臨  
右軍文賦今可見者趙榮祿書耳

以平原爭坐位求蘇米方知其變宋人無不寫爭坐位  
帖也

晉宋人書但以風流勝不為無法而妙處不在法至唐

人始專以法為蹊徑而盡態極妍矣

昔顏平原鹿脯帖宋時在李觀察士行家今為辰玉所藏爭坐位帖在永興安師文家安氏析居分而為二人多見其前段師文後乃併得之相繼入內府今前段至菩提寺行香止為項德新所藏

東坡作書于卷後餘數尺曰以待五百年後人作跋其高自標許如此

書家以險絕為奇此竅惟魯公楊少師得之趙吳興弗

能解也今人眼目為吳興所遮障予得楊公游仙詩  
日益習之

唐林緯乾書學顏平原蕭散古淡無虞褚輩妍媚之習  
五代時少師特近之

臨帖如驟遇異人不必相其耳目手足頭面當觀其舉  
止笑語精神流露處莊子所謂目擊而道存者也

大慧禪師論叅禪云譬如有人具萬萬貫吾皆籍沒盡  
更與索債此語殊類書闕換子米元章云如撐急水

灘船用盡氣力不離故處蓋書家妙在能會神在能  
離所欲離者非歐虞褚薛諸名家伎倆直欲脫去右  
軍老子習氣所以難耳那比析骨還父析肉還母若  
別無骨肉說甚虛空粉碎始露全身晉唐以後惟楊  
凝式解此竅耳趙吳興未夢見在 余此語悟之楞  
嚴八還義明還日月暗還虛空不汝還者非汝而誰  
然余解此意筆不與意隨也甲寅二月

書法雖貴藏鋒然不得以模糊為藏鋒須有用筆如太

阿剗截之意蓋以勁利取勢以虛和取韻顏魯公所  
謂如印印泥如錐畫沙是也細叅玉潤帖思過半矣  
宋高宗於書法最深觀其以蘭亭賜太子令寫五百本  
更換一本即工力可知思陵運筆全自玉潤帖中來  
學稊帖者叅取

柳誠懸書極力變右軍法蓋不欲與稊帖面目相似所  
謂神奇化為臭腐故離之耳凡人學書以姿態取媚  
鮮能解此余於虞褚顏歐皆曾彷彿十一自學柳誠

懸方悟用筆古淡處自今以往不得舍柳法而趨右軍也

吾松書自陸機陸雲創于右軍之前以後遂不復繼響  
二沈及張南安陸文裕莫方伯稍振之都不甚傳世  
為吳中文祝二家所掩耳文祝二家一時之標然欲  
突過二沈未能也以空疎無實際故余書則并去諸  
君子而自快不欲爭也以待知書者品之

此則論雲  
間書派

余性好書而嬾矜莊鮮寫至成篇者然無日不執筆皆



縱橫斷續無倫次語耳偶以冊置案頭遂時為作各體且多錄古人雅致語覺向來肆意殊非用敬之道然余不好書名故書中稍有淡意此亦自知之若前人作書不苟且亦不免為名使耳

吾書無所不臨仿竄得意在小楷書而懶于拈筆但以行草行世亦都非作意書第率爾酬應耳若使當其合處便不能追踪晉宋斷不在唐人後乘也

### 跋自書

臨官奴帖後

右軍官奴帖事五斗米道上章語也已卯秋余試留都  
見真蹟蓋唐冷金牋摹者為閣筆不書者三年此帖後  
歸婁江王元美予于己丑詢之王澹生則已贈新都許  
少保矣此帖類楔叙因背臨及之

臨洛神賦後

大令洛神賦真蹟元時猶在趙子昂家今雖宋搨不復  
見矣今日寫此四行亦唐摹冷金舊蹟余見之檇李項

氏遂師其意試朝鮮鼠鬚筆

書羅語題尾

樂志論與羅氏此篇實山居之人所自寬語余數書之亦如歸來詞以志吾樂耳

書樂志論題尾

余在梁溪見徐季海書道德經評者謂子瞻似之非也子瞻多偃筆季海藏鋒正出欲透紙背安得同論此書欲仿之

書酒德頌題尾

伯倫善閉關雖沉湎自有韜世之致故得與嵇阮輩並稱余飲不能三酌而書此頌又自笑也

臨顏平原誥書後

唐世官誥皆出善書名公之手魯公為禮部尚書猶書朱巨川誥如近世之埋誌非藉手宗匠以為孝慈不足其重蓋如此國朝制誥乃使中書舍人為之寫軸而書法一本沈度姜立綱何能傳後予兩掌制詞及先太史

誥欲自書之忽有非時之命持節長沙封吉藩頒誥之時王程于邁不獲從魯公自書之例因臨顏帖為之撫然

臨顏書後

顏清臣書深得蔡中郎石經遺意後之學顏者以觚稜斬截為入門所謂不叅活句者也余此書竊附魯男子學柳下惠之意

臨天馬賦書後

襄陽書天馬賦余所見已四本一為擘窠大字後題云  
為平海大師書後園水丘公觀特為雄傑在嘉禾黃履  
常叅政家一為檢討王履泰藏乃仿顏平原爭坐帖一  
在吾鄉宋叅政家一在新都吳氏後有黃子久諸元人  
跋子久云展視之時有一大星貫斗而墜其聲如雷宋  
本余已摹取刻石吳本多枯筆別自一種米書然皆真  
蹟也米賦材乃強弩之末而子瞻稱其實月賦以為知  
元章不盡乃曾無一本傳世何也因背臨及之

臨懷素帖書尾

懷素自叙帖真蹟嘉興項氏以六百金購之朱錦衣家  
朱得之內府蓋嚴分宜物沒入大內後給侯伯為月俸  
朱太尉希孝旋收之其初吳郡陸完所藏也文待詔曾  
摹刻停雲館行于世余二十年前在檇李獲見真本年  
來亦屢得懷素它草書鑒賞之唯此為最本朝學素書  
者鮮得宗趣徐武功祝京兆張南安莫方伯各有所入  
豐考功亦得一斑然狂恠怒張失其本矣余謂張旭之

有懷素猶董源之有巨然衣鉢相承無復餘恨皆以平淡天真為旨人目之為狂乃不狂也久不作草今日臨文氏石本因識之

自書卷後

此余壬辰北上時在廣陵舟中書也丙申除夕清臣復持至齋中余重展之因念古人書與年俱老今去壬辰又五年矣無能多勝于曩時深以為媿

酤古齋帖跋



余見懷素一帖云少室中有神人藏書蔡中郎得之古  
之成書者欲後天地而出其持重如此今人朝學執筆  
夕已勒石余深鄙之清臣以所藏余書一一摹勒具見  
結集苦心此猶率意筆遂為行世予甚懼也雖然予學  
書三十年不敢謂入古三昧而書法至余亦復一變世  
有明眼人必能知其解者為書各種以副清臣之請

書大江東詞題尾

余以丙申秋奉使長沙浮江歸道出齊安時余門下徐

自文曰  
卷一  
賜華為黃岡令請余大書東坡此辭曰且勒之赤壁余  
乘利風解纜後作小赤壁詩為吾松赤壁解嘲既而余  
兩被朝命皆在黃武間覽古懷賢知當日坡公舊題詩  
處也因書詞識之

題卷後

醉後磨墨一斗以三文頭雞毛筆書此篇迅疾如追風  
逐電略無凝滯皆自顏尚書米漫士書法得來書家當  
有知者

臨懷素真蹟跋後

藏真書余所見有枯筍帖食魚帖天姥吟冬熱帖皆真蹟以澹古為宗徒求之豪宕奇恠者皆不具魯男子見者也顏平原云張長史雖天姿超逸妙絕古今而楷法精詳特為真正吁此素師之衣鉢學書者請以一瓣香供養之

書荊公詞題尾

王介甫金陵懷古詞東坡于壁上觀之歎曰此老狐精

也其推服若此米元章又稱荆公書絕似五代楊少師  
蘇之詞米之書皆橫絕千古獨不敢傲介甫此公若不  
作宰相豈至掩其長邪

臨稷帖題後

蘭亭敘最重行間章法余臨書乃與原本有異知為聚  
訟家所訶然陶九成載稷帖考尚有以草體當之者政  
不必規規相襲今人去古日遠豈在行段乎

又

趙文敏臨契帖無慮數百本即余所見亦至夥矣余所臨生平不能終篇然使如文敏多書或有入處蓋文敏猶帶本家筆法學不純師余則欲絕肖此為異耳

書自敘帖題後

米元章書多從褚登善悟入登善深于蘭亭為唐賢秀穎第一此本蓋其衣鉢也摹授清臣清臣其實之余素臨懷素自敘帖皆以大令筆意求之時有似者近來解大紳豐考功狂恠怒張絕去此血脉遂累及素師所謂

從門人者不是家珍見過于師方堪傳授也

書後赤壁賦跋

余三見子瞻自書赤壁賦一在樵李黃承玄家一在江西楊寅秋家一在楚中何宇度家皆從都下借臨黃卷有子瞻跋尤勝然皆前賦也後赤壁則惟趙子昂有石本又思陵嘗書之夏禹玉為補圖亦在楊寅秋家因書後赤壁賦并記于此

書陶詩跋後

陶靖節詩儲光羲之源委也韋司直亦其耳孫乎東坡  
和陶雖極力摹擬然禪家所謂夾帶有之矣東坡像太  
白淵明皆相似

書小楷冊題後

小楷書乃致難自臨帖者只在形骸去之益遠當由未  
見古人真蹟自隔神化耳宋時唯米芾有解至今如阿  
閔一見也

書雪賦題後

客有持趙文敏書雪賦見示者余愛其筆法適麗有黃庭樂毅論風規未知後人誰為競爽恐文徵仲瞠乎若後矣遂自書一篇意欲與異趣令人望而知為吾家書也昔人云非惟恨吾不見古人亦恨古人不見吾又云右軍無臣法此則余何敢言然世必有解之者

書各體卷題後

此余在長安呵凍手書及還山舟中待放閒消遣永晝者清臣為沃而裝池及自披之頗似五技窮鼠耳若曰



徇知之合則吾豈敢

臨四家尺牘跋尾

余嘗臨米襄陽書于蔡忠惠黃山谷趙文敏非所好也  
今日展法帖各臨尺牘一篇頗亦相似又及蘇文忠示  
予所習也元人作書經以蘇文忠趙文敏為得二王法  
不及米湯士其持論如此未省所謂

臨柳稷帖題

柳誠懸書蘭亭不落右軍蘭亭叙筆墨蹊逕古人有此

金匱要略卷一  
眼目故能名家

書雪浪齋銘題後

山谷論人家子弟可百不能唯俗便不可醫子瞻自是  
千載人觀其與李伯時王定國諸公會賞翰墨自謂薄  
富貴而厚于書輕死生而重于畫即雪浪以百二十千  
購之所至故無一椽也元龍百尺樓下物政當愧死何  
置喙哉

補龍井記書後

秦太虛撰龍井記直稱蘓家勝友元章此碑絕得李枯  
州三昧惜多殘缺余為補之然聞趙吳興曾欲補米書  
數行一再易之皆不相似曰今人去古遠矣則余其有  
續貂之愧也夫

臨顏帖跋

余近來臨顏書因悟所謂折釵股屋漏痕者惟二王有  
之魯公直入山陰之室絕去歐褚輕媚習氣東坡云詩  
至于子美書至于魯公非虛語也顏書惟蔡明遠序尤

金少卿尺牘卷一  
為沉古米海岳一生不能彷彿蓋亦為學唐初諸公書  
稍乏骨氣耳燈下為此都不對帖雖不至入俗第神采  
璀璨即是不及古人處漸老漸熟乃造平淡米老猶隔  
塵敢自許逼真乎題以志吾愧

又

臨顏太師明遠帖五百本後方有少分相應米元章趙  
子昂止撮其勝會遂在門外如化城鹿車未了事耳

臨十三行跋

此韓宗伯家藏子敬洛神十三行真跡予以閏三月十一日登舟以初八日借臨是日也友人攜酒過余旅舍者甚多余以琴棋諸品分曹款之因得閒身倣此帖既成具得其肉所乏神采亦不足異也

又

文氏二王帖有洛神賦稱為子敬非也此李龍眠書宣和譜所云出入魏晉不虛耳又龍眠摹古則用絹素洛神卷是絹本或唐人書李臨倣之乃爾道雋耶要須以

十三行帖稱量之

書月賦後

小楷書不易工米元章亦但有行押嘗被命倣黃庭作  
千文一本以進今觀其跡但以妍媚飛動取態耳邢子  
愿謂余曰右軍以後惟趙吳興得正衣鉢唐宋皆不如  
也蓋謂楷書得黃庭樂毅論法吳興為多要亦有刻畫  
處余稍及吳興而出入子敬同能不如獨勝余于吳興  
是也

又

余少時為小楷刻畫世所傳黃庭經東方贊後見晉唐人真蹟乃知古人用筆之妙殊非石本所能傳既折衷王子敬顧愷之自成一家因觀昔年書月賦漫題

臨楊少師帖跋後

楊少師步虛詞帖即朱老家藏大仙帖也其書騫翥簡澹一洗唐朝姿媚之習宋四大家皆出于此余每臨之亦得一斑

題禮觀音文

余書此文意欲儼虞永興歐陽率更自愧無出藍之能  
耳趙吳興云永興書唯枕卧帖清峭有晉人韻使余得  
見之書道必不止此

臨顏書題後

顏平原爭坐帖與祭季明文唐時林藻師之楊景度蔡  
端明皆具有一體余此書頗似類顏具眼者謂何

又



右顏平原書絳州帖所刻蓋師陶貞白瘞鶴銘小異平日學右軍書者黃魯直宗之

題自書古詩卷尾

今日臨古詩數首俱不入晉人室唯顏平原虞永興楊少師三家差不愧耳時乙巳正月十九日為余懸弧辰也

題爭坐位帖後

爭坐位帖宋蘓黃米蔡四家書皆仿之唐時歐虞褚薛

諸家雖刻畫二王不無拘于法度惟魯公天真爛漫姿態橫出深得右軍靈和之致故為宋一代書家淵源余以陝本漫漶乃摹此宋搨精好者刻之戲鴻堂中

臨褚遂良西昇經跋

褚遂良西昇經與淳熙秘閣續帖所刻黃庭經同一筆法真跡昔藏新都殷尚書家余在長安曾于殷叅軍見之永嘉王中舍為吳太學手摹一本不差毫髮後歸武林洪黃門黃門以余寫法華經字形相等遂以贈余且

曰子臨百本使馬骨追風畫龍行雨以一本見酬余茫  
然未知何時得慰其意

臨王右軍曹娥碑跋

余為庶常時館師韓宗伯出所藏曹娥碑真跡絹本示  
余乃宋德壽殿題元文宗命柯九思鑒定書畫賜以此  
卷趙孟頫跋記其事甚詳且云見此如岳陽樓親聽仙  
人吹笛可以權衡天下之書矣當時以館師嚴重不敢  
借摹亦渝敝難摹略可彷彿于非烟非霧間耳因書曹

娥碑識之

臨內景黃庭跋

內景經全在筆墨畦邇之外其為六朝人得意書無疑  
今人作書只信筆為波畫耳結構縱有古法未嘗真用  
筆也善用筆者清勁不善用筆者濃濁不獨連篇各體  
有分別一字中亦具此兩種不可不知也

臨楔帖跋後

余書蘭亭皆以意背臨未嘗對古刻一似撫無絃琴者

覺尤延之諸君子葛藤多事耳

臨楊少師書後

余以意做楊少師書山陽此論雖不盡似略得其破方  
為圓削繁為簡之意蓋與趙集賢書如甘草甘遂之相  
反亦教外別傳也

書養生論跋後

東坡先生數書嵇叔夜養生論憂患之餘有意于道言  
如此它日又曰長生未能學且學長不死洪覺範妙喜

金史四庫全書  
卷一  
禪師謂其多生般若種子深固又進于所謂養生者要以忠孝文章節義如公升天成佛俱是探囊取物其八識田中自具兩家種子循業發現不學而能也因書此論及之

臨趙松雪書跋後

婁水王奉常家藏趙吳興詩帖致佳余從高仲舉見之把玩移日舟行閒適漫臨一過余素不為吳興書略得形模耳聞吳興臨米元章壯懷賦數行輒復自廢除以

俟它人覆醬瓿也

書琵琶行題後

白香山深于禪理以無心道人作此有情癡語幾所謂  
木人見花鳥者耶山谷為小詞而秀鐵訶之謂不止落  
驢胎馬腹則慧業綺語猶當懺悔耳余書此歌用米襄  
陽楷法兼撥鐙意欲與艷詞相稱乃安得大珠小珠落  
研池也

書別賦題後

陸魯望詩云丈夫非無淚不灑離別間伏劍對尊酒恥  
為游子顏蓋反文通此賦如子雲反騷惜江令少此一  
轉耳義陽吳光祿丞徹如寄褚登善千文示余披賞數  
日風雨如晦泓穎久廢朝來始見霽色偶然欲書為竟  
此卷觀者必訝謂余本家筆安在也

書古尺牘題後

行書十行不敵楷書一行米南宮語也時一為之以斂  
浮氣竟此紙凡十起對客信乎孫虔禮所云神怡務閒



之難也

書圓通偈後

以虞伯施廟堂碑法書此偈貞觀時楞嚴猶未經翻譯  
永興破邪論亦世諦流布耳顏魯公頗事道言李北海  
但作碑板懷素著袈裟犯飲酒戒草書狂縱不足與寫  
經手校量功德唐世書學甚盛皆不為釋所用梁肅房  
融其書不稱惟裴休深于內典兼臨池之能淳熙帖所  
刻是已至宋蘇黃兩公大以翰墨為佛事宋人書不及

唐其深心般若故當勝也余蚤歲習耳根圓通每書之  
幾所謂一舉一回新者

臨坐位帖題後

新都汪太學孺仲以宋搨爭坐位帖見示神采奕奕字  
形較陝刻差肥余臨寫之次時有訛字乃知是米海岳  
所臨米嘗自記有臨爭坐帖在浙中此殆其真跡入石  
者耶

題楷書雪賦後

楷書以智永千文為宗極虞永興其一變耳文徵仲學  
千文得其姿媚予以虞書入永書為此一家筆法若退  
穎滿五簾未必不合符前人顧經歲不能成千字卷冊  
何稱習者之門自分與此道遠矣

臨鍾紹京書跋後

右唐鍾紹京書通甲神經有宣和政和小璽宋徽宗標  
識倪元鎮家藏有元鎮跋語筆法精妙迴腕藏鋒得子  
敬神髓趙文敏正書實祖之余從真跡臨寫數行鍾書

世無傳本自此可以意求耳

臨虞永興書跋後

虞永興常自謂于道字有悟蓋于發筆處出鋒如抽刀  
斷水正與顏太師錐畫沙屋漏痕同趣前人巧處故應  
不傳學虞者輒成算子筆陣所訶以此余非能書能解  
之耳

臨海岳千文跋後

米海岳行書傳于世間與晉人幾爭道馳矣顧其平生

所自負者為小楷貴重不肯多寫以故罕見其跡子游  
京師曾得鑒李伯時西園雅集圖有米南宮蠅頭題跋  
最似蘭亭筆法己丑四月又從唐完初獲借此千文臨  
成副本稍具優孟衣冠大都海岳此帖全倣褚河南哀  
冊枯樹賦間入歐陽率更不使一實筆所謂無往不收  
蓋曲盡其趣恐真本既與余遠便欲忘其書意聊識之  
于紙尾 此余己丑所臨也今又十年所矣筆法似昔  
未有增長不知何年得入古人之室展卷太息不止書

道也戊戌四月三日

臨十七帖書後

十七帖硬黃本宋時魏泰家藏淳熙秘閣續帖亦有刻  
予在都下友人汝陽王思延得硬黃本曾借臨一卷已  
于濟南邢子愿冏卿見所刻石即王本也余以臨卷質  
之子愿謬稱合作第謂趙吳興臨十七帖流落人間當  
不下數十本請多為之足傳耳余自是時寫此帖以懶  
故終不能多也

臨洛神賦書後

樂毅論乃扇書後人又以為右軍自書刻石梁世所摹  
與唐摹字形各異淳熙秘閣梁摹本也予家戲鴻堂帖  
唐摹本也又有一本唐摹在長安李氏曾屬余跋亦有  
文壽承跋蓋貞觀中太宗命褚遂良等摹六本賜魏徵  
諸臣此六本自唐至今余猶及見其二恨梁摹白麻紙  
真跡為新都吳生所有余亦不甚臨樂毅論每以大令  
十三行洛神賦為宗極耳

臨像贊題後

柳誠懸小書玄真護命經不知其所自因臨畫像讚知誠懸用其筆意小加勁耳唐人書無不出于二王但能脫去臨倣之迹故稱名家世人但學蘭亭面誰得其皮與其骨凡臨書者不可不知此語

跋臨女史箴

昔年見晉人畫女史箴云是虎頭筆分類題箴附于畫左方則大令書也大令書女史箴不聞所自據孫過庭



書譜有云右軍太師箴豈即女史而訛承于後耶然其字結體全類十三行則又非王右軍也暇日適發興欲書遂復倣不見真跡聊以意取乃不似耳

臨宣示表題後

鍾太傅書余少而學之頗得形模後得從韓館師借唐楊戎輅表臨寫始知鍾書自有入路蓋猶近隸體不至如右軍以還姿態橫溢極鳳翥鸞翔之變也閣帖所收惟宣示表還示帖皆右軍之鍾書非元常之鍾書但觀

王世將宋儋諸跡有其意矣辛丑冬因臨宣示表及之

跋臨瘞鶴銘

黃涪翁云大字無過瘞鶴銘小字無過遺教經今世所傳遺教直唐經生手耳瘞鶴則陶隱居書山谷學之余欲縮為小楷偶失此帖遂以黃庭筆法書之

書舞鶴賦後

往余以黃庭樂毅真書為人作榜署書每懸看輒不得佳因悟小楷法使可展為方丈者乃盡勢也題榜如細

書亦跌宕自在惟米襄陽近之襄陽少時不能自立家  
專事摹帖人謂之集古字已有規之者曰須得勢乃傳  
正謂此因書舞鶴賦及之

跋十三行洛神賦

趙文敏得宋思陵十三行于陳灝蓋賈似道所購先九  
行後四行以悅生印款之此子敬真跡至我朝惟存唐  
摹耳無論神采即形模已不相似惟晉陵唐太常家藏  
宋搨為當今第一曾一見于長安臨寫刻石恨趙吳興

有此墨跡未盡其趣蓋吳興所少正洛神疏雋之法使我得之政當不啻也

題書千字文後

千文凡書四載先後作止筆墨間闊幾如寫一大藏經今至延津始成之山中自恃多暇乃至不如吏牘之餘予所愧于嵇叔夜也

題歸去來辭後

以米元章筆法書淵明辭差為近之

臨米書後

是日海上顧氏以米襄陽真跡見示余為臨此大都米家書與趙吳興各為一門庭吳興臨米輒不能似有以也吳興書易學米書不易學二公書品于此辨矣

書飲中八仙歌後

陸士衡作竹林七賢論以嵇阮為標顏延之作五君詠王濬沖山巨源皆在門外弗復及少陵八仙歌其尤著者賀季真太白耳他日作八哀詩于飲中八仙獨著汝陽

王所謂虬鬚似太宗色映塞外春者豈讓帝之子負奇  
自廢韜光劇采醉鄉為隱者耶即諸子當非酒人可概  
矣

跋契帖後

唐相褚河南臨契帖白麻跡一卷曾入元文宗御府有  
天厯之寶及宣政紹興諸小璽宋景濂小楷題跋吾鄉  
張東海先生觀于楊氏之衍澤樓蓋雲間世家所藏也  
筆法飛舞神采奕奕可想見右軍真本風流實為希代

之寶余得之吳太學每以勝日展玩輒為心開至于手  
臨不一二卷止矣苦其難合也昔章子厚日臨蘭亭一  
卷東坡聞之以為從門入者不是家珍東坡學書宗旨  
如此趙文敏臨稊帖最多猶不至如宋之紛紛聚訟直  
以筆勝口耳所謂善易者不談易也

臨官奴帖真蹟

此帖在淳熙秘閣續刻米元章所謂絕似蘭亭叙昔年  
見之南都曾記其筆法于米帖曰字字騫翥勢奇而反

正藏鋒裏鐵道勁蕭遠庶幾為之傳神已聞為海上潘方伯所得又復歸王元美王以貽余座師新安許文穆公文穆傳之少子胄君一武弁借觀因轉售之今為吳太學用卿所藏頃于吳門出示余快余二十餘年積想遂臨此本云抑余二十餘年時書此帖茲對真跡豁然有會蓋漸修頓證非一朝夕假令當時力能致之不經苦心懸念未必契真懷素有言豁焉心胄頓釋凝滯今日之謂也時戊申十月十有三日舟行朱涇道中日書



蘭亭及此帖一過以官奴筆意書稷帖尤為得門而入  
評舊帖

題絳帖一卷後

宋揭絳州帖乃官奴嫡冢故佳本在汝帖長沙之上昔  
人得古帖數行專心學之遂以名世況此本已具各體  
即不完善比之威鳳一毛可藏也

題娑羅樹碑後

保母帖辭中令帖大令實為北海之濫觴今人知學北

海而不追踪大令是以佻而無簡直而少致北海曰似我者俗學我者死不虛也趙吳興猶不免此况餘子哉

黃庭經跋

黃庭經以師古齋刻為第一乃遂良所臨也淳熙續帖亦有之

書契帖後

此本發筆處是唐人口口相授筆訣也米海岳深得其意舟過崇德縣觀

題契帖黃庭各帖後

蘭亭無下本此刻當是唐人鈎摹其黃庭吾不甚好頗覺其俗告墓表集智永千文而成之宣示表轉刻已多既失其渾宕之氣聊存形似後之學者當以意會之可也

題雲麾將軍碑

此碑文多不全獨此刻前後讀之皆有倫次當是石未泐時拓本殊可寶藏歐陽金石錄每有不以書家見收

金匱石室書  
卷一  
者况北海為書中仙乎

題潁上楔帖後

潁上縣有井夜放白光如虹亘天縣令異之乃令人探井中得一石六銅壘其石所刻黃庭經蘭亭叙皆宋楊也余得此本以較各帖所刻皆在其下當是米南宮所摹入石者其筆法頗似耳

題洛神遠遶各帖後

大令洛神賦多集後人筆意豈元人趙松雪為之耶遠

遠帖告墓之流與辭中令書皆子敬得意筆也 辭中  
令帖是李邕淵源其為子敬筆無疑

題羣玉堂帖

羣玉堂帖所載虞世南天馬贊乃柳子厚文荆門行見  
李羣玉集非李枯州也詩亦不類開元及柳公權詩皆  
謬豈集字為之耶

題獻之帖後

大令辭中令帖評書家不甚及或出于米元章黃長睿

之後耳觀其運筆則所謂鳳翥鸞翔似奇反正者深為漏洩家風必非唐以後諸人所能夢見也李北海似得其意

書黃庭經後

吳用卿得此余乍展三四行即定為唐人臨右軍既閱竟中間于淵字皆有缺筆蓋高祖諱淵故虞褚諸公不敢觸耳小字難于寬展而有餘又以蕭散古淡為貴顧世人知者絕少能于此卷細參當知吾言不謬也

評子敬蘭亭帖

此卷用筆蕭散而字形與筆法一正一偏所謂右軍書如鳳翥鸞翔跡似奇而反正邇來學黃庭經聖教序者不得其解遂成一種俗書彼倚藉古人自謂合轍襍毒入心如油入麪帶累前代諸公不少余故為拈出使知書家自有正法眼藏也

又

余觀二王真跡十餘帖矣獨此卷心眼相印自許不惑

金匱石室書  
卷一  
又須知永興書法從此發源也

題王珣真蹟

米南宮謂右軍帖十不敵大令跡一余謂二王跡世猶有  
存者唯王謝諸賢筆尤為希覲亦如子敬之于逸少耳  
此王珣書瀟洒古淡東晉風流宛然在眼用卿得此可  
遂作寶晉齋矣

虞伯施積時帖

此卷或疑米臨然其研筆處特為瘦勁米書以態勝不



辨此也王元美家有虞永興汝南公主墓志客亦有謂  
米臨者元美自題曰果爾則賈王得羊於願足矣此帖  
則當出其右具眼者自能識取

題評紙帖為朱敬韜

米元章評紙如陸羽品泉各極其致而筆法都從顏平  
原幻出與吾友王宇泰所藏天馬賦同是一種書臨寫  
彌月仍歸用卿用卿其寶之

孫虔禮千文跋

此孫過庭真蹟也觀其結字猶存漢魏間法蓋得之章草為多即永師千文亦爾乃知作楷書必自八分大篆入門沿流討源見過于師方堪傳授學過庭者又自右軍求之可也

題范牧之楔帖

牧之書蘭亭叙筆勢道媚以姿態勝韻自喜宋仁卿裝之屏角十餘年時象先尚髻鬣未及牧去茲乃念手澤復從仁卿請回此卷昔右軍書不為諸子所寶惜右軍

每有家雞野鶩之嘆牧之書固自古雅而象先即善書何忍人稱過父也

題朱敬韜所藏趙榮祿鮮于伯機真蹟

吳興書少有師褚登善者此前二幅似之又所報燕京奇畫是孫過庭法也鮮于伯機評書天真爛漫盡力與吳興敵者是皆可傳也今日過敬韜出此相視因借歸摹之戲鴻堂帖中

跋智永帖

金史四庫全書  
卷一  
此永師做鍾元常宣示表每用筆必曲折其筆宛轉面  
向沉着收束所謂當其下筆欲透過紙背者唐以後此  
法漸漸盡矣

題徐道寅手書諸經後

真如不變千佛即一不變隨緣一佛而千古佛所以有  
云佛之一字吾不喜聞也雖然地藏經云人命終時聞  
一佛名號一辟支佛名號皆得免苦當四大分散神識  
分飛一佛名號俱不能記憶自非平生串習安能于爾

時得力所謂一句染神厯劫不易徐居士道寅所以書  
寫受持念誦此千佛名經也唐以曲江題名為千佛名  
經宋人以元祐黨碑為千佛名經道寅以千佛名經為  
千佛名經是同是別

跋趙子昂書過秦論

吳興此書學黃庭內景經時年三十八歲最為善者機  
也成名以後墮然自放亦小有習氣于是鴈書亂之鈍  
滯吳興不少矣

跋張旭草書

項玄度出示謝客真蹟余乍展卷即命為張旭卷末有  
豐考功持謝書甚堅余謂玄度曰四聲定于沈約狂草  
始于伯高謝客時都無是也且東明二詩乃庾開府步  
虛詞謝安得預書之乎玄度曰此陶弘景所謂元常老  
骨更蒙榮造者矣遂為改跋

跋率更千文

書家以分行布白謂之九宮元人作書經云黃庭有六

分九宮曹娥有四分九宮今觀信本千文真有完字具于胸中若構凌雲臺一一皆衡劑而成者米南宮評其真書到內史信矣此本傳為信本真蹟予較之乃廊填之最精者所謂下真蹟一等耳

跋東坡書後

東坡先生居黃自謂多難畏事時猶禁其詩耳後復并其書禁之故宣和進御書畫凡有蘓黃題跋者皆割去靖康之變御府所藏盡為金人輦之而北而先生墨跡

流落人間者居然獨完誰謂善類竟可磨滅耶

跋吳傳朋書

昔人稱吳傳朋說真書為宋朝第一今觀九歌應規入矩深得蘭亭洛神遺意高宗洞精書法至為閣筆歎賞不虛也左方有馬和之侍郎圖此必當時有李伯時畫九歌米元章作書而二公復倣之耳伯時書乃全用鍾法宣和譜謂其追蹤魏晉今始見之當與米元章並傳者宋之小楷名家盡此矣



跋赤壁賦後

坡公書多偃筆亦是一病此赤壁賦庶幾所謂欲透紙背者乃全用正鋒是坡公之蘭亭也真跡在王履善家每波畫盡處隱隱有聚墨痕如黍米珠恨非石刻所能傳耳嗟乎世人且不知有筆法况墨法乎

題懷仁聖教序真跡

古人摹書用硬黃自運用絹素此卷首有宋徽宗金書縹字與內景經同一黃素知為懷仁一筆自書無疑書

苑所云雜取碑字右軍劇迹咸萃其中非也黃長睿書  
家董狐亦以書苑為據恨其不見真蹟輒隨人言下轉  
耳

又

此書視陝本特為姿媚唐時稱為小王書若非懷仁自  
運即不當命之小王也吾家有宋舍利塔碑云習王右  
軍書集之為習正合余因此自信有會

跋魯公送劉太冲敘

顏魯公送劉太冲叙鬱屈瑰奇于二王法外別有異趣  
米元章謂如龍蛇生動見者目驚不虛也宋四家書派  
皆出魯公亦只爭坐帖一種耳未有學此叙者豈當時  
不甚流傳耶真跡在長安趙中舍士禎家以余借摹遂  
為好事者購去余凡一再見不復見矣淳熙秘閣續帖  
亦有刻

題大令洛神十三行真跡

趙吳興曾得洛神十三行于陳集賢灝自題此晉時麻

箋思陵極力搜訪僅獲九行百七十六字故米友仁跋  
作九行宋末賈似道復得四行七十四字欲續于後則  
于九行之跋不相屬遂以四行別裝于後以悅生印及  
長字印款之今此本不知猶在人間不余所摹秀州項  
子京藏是宣和譜中所收吳興云更有唐人臨本後有  
柳公權跋亦神物也視世所傳十三行宋搨何啻霄壤  
耶

跋鹿脯帖後

鹿脯帖真跡與宋搨本不唯字形大小不倫乃其文亦  
小異宋搨政自不足據也十七帖清晏歲豐又所使有  
豐一鄉故自名處予極不解豐一鄉作何語及得高麗  
刻本乃云所出有異產讀之豁然因知王著但憑倣書  
入石耳

跋楊義和黃庭經後

黃素黃庭經陶穀跋以為右軍換鵞書米芾跋以為六  
朝人書無虞褚習氣惟趙孟頫以為飄飄有仙氣乃楊

許舊迹而張雨題吳興過秦論直以為學楊義和書吳興精鑒必有所據非臆語也按真誥稱楊書祖效邈法力同二王述書賦亦云方圓自我結構遺名如舟楫之不繫混寵辱以若驚其為書家所重若此顧唐時止存草書六行今此經行楷數千字神采奕然傳流有緒豈非墨池奇蹟耶元時在鮮于樞家余昔從館師韓宗伯借摹數行茲勒以冠諸帖楊在右軍後以是神仙之跡不復係以時代耳

跋吳雲壑書後

吳琚書自米南宮外一步不窺京口北固山有天下第一江山榜書即其筆也始于都下見七言絕一幅不款名姓但有雲壑居士印偶閱宋經籍志雲壑集吳琚撰知為琚書已于新安白岳下山客持晦翁書歸去來辭迺絕似米元章後有雲壑二字因得審定今藏于家此詩沒于焦山江中潤州守霍君為余拓墨本然已在若明若晦間不可臨摹矣

題溫飛卿書

湖陰曲溫飛卿書似平原書而遒媚有態米元章從此  
入門昔年殷司馬之孫持至長安留予案上兩月余以  
溫庭筠溫字頗漫疑是王黃華書黃華亦名庭筠字跡  
近米家父子故耳川中黃昭素乃謂此必曾入梁內府  
梁諱溫字遂磨去意或有之

跋李北海縉雲三帖

黃長睿評張從申書出于北海趙子固又以北海學子



敬病在歆側若張從申即無此矣然從申書實似北海之法華寺碑而北海出奇不窮故嘗勝云余嘗謂右軍如龍北海如象世必有肯予言者

跋李伯時書

米海岳云少時未能立家但規摹法帖謂之集古字今觀九歌良然左方有伯時畫畫史所稱與伯時經營九歌者是已伯時孝經力追鍾法宣和譜謂書逼魏晉不虛耳二帖皆節文

書度人經後

余曾見柳誠懸小楷度人經遒勁有致蔡君謨茶錄頗倣之世未有傳者此清靜經似永興破邪論海上潘氏所藏宋帖也

跋索靖出師頌

鍾太傅書自晉渡江時止傳宣示表百餘年間妙跡已絕寧知今世有索靖出師頌耶此本在檇李項子京家故是甲觀

跋子敬帖

寶晉帖刻此帖大軍止余檢子敬別帖自己至至末辭意相屬原是一帖為收藏者離去耳二王書有不可讀者皆此類也米元章故以此為子敬第一書

跋謝莊詩後

謝莊詩帖于新都汪景醇得摹本未見真蹟書法似閣帖所謂蕭子雲者而小加妍雋宋高宗書近之

題張長史真書

長史郎官壁記世無別本唯王奉常敬美有之陳仲醇摹以寄余知學草必自真入也

跋契帖小本

定武契帖唯賈秋壑所藏至百餘種令其客廖瑩中縮為小本或云唐時褚河南已有之此本余已丑所書亦從館師韓宗伯借褚摹縮為蠅頭體第非定武本耳

畫禪室隨筆卷一

欽定四庫全書

子部

畫禪室隨筆卷二

四

詳校官庶吉士

臣

汪彥博

員外郎

臣

牛稔文覆勘

總校官原任中允

臣

王燕緒

校對官編修

臣

勵守謙

謄錄監生

臣

邵敬修

欽定四庫全書

畫禪室隨筆卷二

明 董其昌 撰

畫訣

士人作畫當以草隸奇字之法為之樹如屈鉄山似畫沙絕去甜俗蹊徑乃為士氣不爾縱儼然及格已落畫師魔界不復可救藥矣若能解脫繩束中便是透

畫家六法一氣韻生動氣韻不可學此生而知之自有  
天授然亦有學得處讀萬卷書行萬里路胸中脫去  
塵濁自然丘壑內營立成鄞鄂隨手寫出皆為山水  
傳神矣

李成惜墨如金王洽潑墨潘成畫夫學畫者每念惜墨  
潑墨四字于六法三品思過半矣

古人論畫有云下筆便有凹凸之形此最縣解吾以此

自老以游丘壑間矣

氣霽地表雲斂天末洞庭始波木葉微脫春草碧色春  
水綠波送君南浦傷如之何四更山吐月殘夜水明  
樓海風吹不斷江月照還空宋書院各有試目思陵  
嘗自出新意以品畫師余欲以此數則徵名手圖小  
景然少陵無人謫仙死文沈之後廣陵散絕矣奈何  
潘子輩學余畫視余更工然皴法三昧不可與語也畫  
有六法若其氣韻必在生知轉工轉遠



畫中山水位置皴法皆各有門庭不可相通惟樹木則不然雖李成董源范寬郭熙趙大年趙千里馬夏李唐上自荆關下逮黃子久吳仲圭輩皆可通用也或曰須自成一家此殊不然如柳則趙千里松則馬和之枯樹則李成此千古不易雖復變之不離本源豈有舍古法而獨創者乎倪雲林亦出自郭熙李成稍加染雋耳如趙文敏則極得此意蓋萃古人之美于樹木不在石上着力而石自秀潤矣今欲重臨古人

樹木一冊以為奚囊

古人畫不從一邊生去今則失此意故無八面玲瓏之巧但能分能合而皴法足以發之是了手時事也其次須明虛實實者各段中用筆之詳略也有詳處必要有略處實虛互用疎則不深邃密則不風韻但審虛實以意取之畫自奇矣

凡畫山水須明分合分筆乃大綱宗也有一幅之分有一段之分于此了然則畫道過半矣

樹頭要轉而枝不可繁枝頭要斂不可放樹梢要放不可緊

畫樹之法須專以轉折為主每一動筆便想轉折處如寫字之于轉筆用力更不可往而不收樹有四肢謂四面皆可作枝着葉也但畫一尺樹更不可令有半寸之直須筆筆轉去此秘訣也

畫須先工樹木但四面有枝為難耳山不必多以簡為貴

作雲林畫須用側筆有輕有重不得用圓筆其佳處在  
筆法秀峭耳宋人院體皆用圓皴北苑獨稍縱故為  
一小變倪雲林黃子久王叔明皆從北苑起祖故皆  
有側筆雲林其尤著者也

北苑畫小樹不先作樹枝及根但以筆點成形畫山即  
用畫樹之皴此人所不知乃訣法也

北苑畫雜樹但只露根而以點葉高下肥瘦取其成形  
此即米畫之祖最為高雅不在斤斤細巧

畫人物須顧盼語言花果迎風帶露禽飛獸走精神脫  
真山水林泉清閒幽曠屋廬深邃橋渡往來山脚入  
水澄明水源來歷分曉有此數端即不知名定是高  
手

董北苑畫樹多有不作小樹者如秋山行旅是也又有  
作小樹但只遠望之似樹其實憑點綴以成形者余  
謂此即米氏落茄之源委蓋小樹最要淋漓約略簡  
于枝柯而繁于形影欲如文君之眉與黛色相參合

則是高手

古人云有筆有墨筆墨二字人多不識畫豈有無筆墨者但有輪廓而無皴法即謂之無筆有皴法而不分輕重向背明晦即謂之無墨古人云石分三面此語是筆亦是墨可參之

畫家以古人為師已自上乘進此當以天地為師每朝起看雲氣變幻絕近畫中山山行時見奇樹須四面取之樹有左看不入畫而右看入畫者前後亦爾看

金少日月全書 卷二  
得熟自然傳神傳神者必以形形與心手相湊而相忘神之所托也樹豈有不入畫者特當收之生綃中茂密而不繁峭秀而不蹇即是一家眷屬耳

畫樹木各有分別如畫瀟湘圖意在荒遠滅沒即當作大樹及近景叢木如園亭景可作楊柳梧竹及古檜青松若以園亭樹木移之山居便不稱矣若重山複嶂樹木又別當直枝直幹多用攢點彼此相藉望之模糊鬱葱似入林有猿啼虎嘯者乃稱至如春夏秋

冬風晴雨雪又不在言也

枯樹最不可少時于茂林中間出乃奇古茂樹惟檜栢  
楊柳椿槐要鬱森其妙處在樹頭與四面參差一出  
一八一肥一瘦處古人以木炭畫圈隨圈而點之正  
為此也

柳宋人多高垂柳又有點葉柳垂柳不難畫只要分枝  
頭得勢耳點柳葉之妙在樹頭圓鋪處只以汁綠漬  
出又要森蕭有迎風搖颺之意其枝須半明半暗又



金少曰屋全言  
春二月柳未垂條秋九月柳已衰颯俱不可混設色  
亦須體此意也

山之輪廓先定然後皴之今人從碎處積為大山此最是病古人運大軸只三四大分合所以成章雖其中細碎處多要之取勢為主吾有元人論米高二家山書正先得吾意

畫樹之竅只在多曲雖一枝一節無有可直者其向背俯仰全于曲中取之或曰然則諸家不有直樹乎曰

樹雖直而生枝發節處必不都直也董北苑樹作勁挺之狀特曲處簡耳李營丘則千屈萬曲無復直筆矣

畫家之妙全在烟雲變滅中米虎兒謂王維畫見之最多皆如刻畫不足學也惟以雲山為墨戲此語雖似過正然山水中當著意烟雲不可用鈎染當以墨漬出令如氣蒸冉冉欲墮乃可稱生動之韵

趙大年畫平遠絕似右丞秀潤天成真宋之士夫畫此

一派又傳為倪雲林雲林工緻不敵而荒率蒼古勝矣今作平遠及扇頭小景一以此二人為宗使人玩之不窮味外有味可也

畫平遠師趙大年重山疊嶂師江貫道皴法用董源麻皮皴及瀟湘圖點子皴樹用北苑子昂二家法石法用大李將軍秋江待渡圖及郭忠恕雪景李成畫法有小幘水墨及着色青綠俱宜宗之集其大成自出機軸再四五年文沈二君不能獨步吾吳矣

作畫凡山俱要有凹凸之形先鉤山外勢形像其中則用直皴此子久法也

畫與字各有門庭字可生畫不可熟字須熟後生畫須生外熟

### 畫源

吾家有董源龍宿郊民圖不知所取何義大都簞壺迎師之意蓋宋藝祖下江南時所進御者畫甚奇名則諂矣

董北苑蜀江圖瀟湘圖皆在吾家筆法如出二手又所藏北苑畫數幀無復同者可稱畫中龍

張擇端清明上河圖皆南宋時追摹汴京景物有西方美人之思筆法纖細亦近李昭道惜骨力乏耳

王叔明為趙吳興甥其畫皆摹唐宋高品若董巨李范王維備能似之若于刻畫之工元季當為第一

高彥敬尚書畫在逸品之列雖學米氏父子乃遠宗吾家北苑而降格為墨戲者

倪迂在勝國時以詩畫名世其自標置不在黃公望王叔明間自云我此畫深得荆關遺意非王蒙輩所能夢見也然定其品當稱逸格蓋米襄陽趙大年一派耳于黃王真伯仲不虛也

畫譜不載司馬君實予曾見其畫大類營丘有小米作一幀配之宋人題款甚多因思古人自不可盡其伎倆

元季四大家以黃公望為冠而王蒙倪瓚吳仲圭與之

對壘此數公評畫竟以高彥敬配趙文敏恐非偶也  
余藏北苑一卷諦審之有二姝及鼓瑟吹笙者有漁人  
布網漉魚者乃瀟湘圖也蓋取洞庭張樂地瀟湘帝  
子遊二語為境耳余亦嘗遊瀟湘道上山川奇秀大  
都如此圖而是時方見李伯時瀟湘卷曾效之作一  
小幀今見北苑乃知伯時雖名宗所乏蒼莽之氣耳  
石田春山欲雨圖卷向藏王元美家今歸余處春郊牧  
馬圖或曰趙王孫子昂或云仲穆余定以為五代人

筆

王右丞畫余從樵李項氏見釣雪圖盈尺而已絕無皴  
法石田所謂筆意凌競人局脊者最後得小幀乃趙  
吳興所藏頗類營丘而高簡過之又于長安楊高郵  
所得山居圖則筆法類大年有宣和題危樓日暮人  
千里歌枕秋風鴈一聲者然總不如馮祭酒江山雪  
霽圖具有右丞妙趣予曾借觀經歲今如漁父出桃  
源矣



倪雲林生平不畫人物惟龍門僧一幀有之亦罕用圖  
書惟荆蠻民一印者其書遂名荆蠻民今藏余家雪  
有華溪勝國時人多寫華溪漁隱蓋是趙承旨倡之  
王叔明是趙家甥故亦作數幀今皆為余所藏余每  
欲買山雪上作桃源人以應畫識

丁酉三月十五日余與仲醇在吳門韓宗伯家其子古  
周携示余顏書自身告徐季海書朱巨川告即海岳  
書史所載皆是雙璧又趙千里三生圖周文矩文會圖

李龍眠白蓮社圖惟顧愷之作右軍家園景直酒肆上人耳

項又新家趙千里四大幀千里二字金書余與仲醇諦審之乃顏秋月筆也

黃子久畫以余所見不下三十幀要之浮巒暖翠為第一恨景碎耳

趙文敏洞庭兩山二十幀各題以騷語四句全學董源為余家所藏

郭忠恕越王宮殿向為嚴分宜物後籍沒朱節菴國公  
以折俸得之流傳至余處其長有三尺餘皆沒骨山  
也余細檢乃畫錢鏐越王宮非勾踐也

李成晴巒蕭寺文三橋售之項子京大青綠全法王維  
今歸余處細視之名董羽也

吳琚晉陵人書學米南宮可以奪真今北固天下第一  
江山題榜是其跡也所著有雲壑集余在京師見宋  
人挂幘絕類南宮但有雲壑印遂定為琚筆題尾數

行使琚不泯沒也

仲醇絕好瓚畫以為在子久山樵之上余為寫雲林山  
景一幀歸之題云仲醇悠悠忽忽土木形骸似嵇叔  
夜近代唯懶瓚得其半耳云云政是識韵人了不可  
得

余長安時寄仲醇書云所欲學者荆關董巨李成此五  
家畫尤少真蹟南方宋畫不堪賞鑒兄等為訪之作  
一銘心記如宋人者俟弟書成與合一本即不能收

藏聊以適意不令海岳獨行畫史也

京師楊太和家所藏唐晉以來名蹟甚佳余借觀有右  
丞畫一幀宋徽廟御題左方筆勢飄舉真奇物也檢  
宣和畫譜此為山居圖察其圖中松針石脉無宋以  
後人法定為摩詰無疑向相傳為大李將軍而拈出  
為輞川者自余始

余家所藏北苑畫有瀟湘圖商人圖秋山行旅圖又二  
圖不著其名一從白下徐國公家購之一則金吾鄭

君與余博古懸北苑于堂中兼以俛黃諸蹟無復于  
北苑著眼者政自不知元人來處耳

李伯時西園雅集圖有兩本一作于元豐間王晉卿都  
尉之第一作于元祐初安定郡王趙德麟之邸余從  
長安買得團扇上者米襄陽細楷不知何本又別見  
仇英所摹文休承跋後者

余買龔氏江貫道江山不盡圖法董巨是綃素其卷約  
有三三丈後有周密林希逸跋貫道負茶癖葉少蘊

常薦之故周跋云恨不乞石林見也

文人之畫自王右丞始其後董源僧巨然李成范寬為  
嫡子李龍眠王晉卿米南宮及虎兒皆從董巨得來  
直至元四大家黃子久王叔明倪元鎮吳仲圭皆其  
正傳吾朝文沈則又遙接衣鉢若馬夏及李唐劉松  
年又是李大將軍之派非吾曹易學也

禪家有南北二宗唐時始分畫之南北二宗亦唐時分  
也但其人非南北耳北宗則李思訓父子着色山流

傳而為宋之趙幹趙伯駒伯驢以至馬夏輩南宗則  
王摩詰始用渲淡一變鈎斫之法其傳為張璪荆關  
郭忠恕董巨米家父子以至元之四大家亦如六祖  
之後有馬駒雲門臨濟兒孫之盛而北宗微矣要之  
摩詰所謂雲峰石迹迥出天機筆意縱橫參乎造化  
者東坡贊吳道子王維畫壁亦云吾于維也無間然  
知言哉

元季諸君子畫惟兩派一為董源一為李成成畫有郭



河陽為之佐亦猶源畫有僧巨然副之也然黃倪吳  
王四大家皆以董巨起家成名至今隻行海內至如  
學李郭者朱澤民唐子華姚彥卿輩俱為前人蹊徑  
所壓不能自立堂戶此如南宗子孫臨濟獨盛當亦  
紹隆祖法者有精靈男子耶

畫無筆迹非謂其墨淡模糊而無分曉也正如善書者  
藏筆鋒如錐畫沙印印泥耳書之藏鋒在于執筆沈  
着痛快人能知善書執筆之法則能知名畫無筆迹

之說故古人如大令今人如米元章趙子昂善書必  
能善畫善畫必能善書其實一事耳

余嘗謂右軍父子之書至齊梁而風流頓盡自唐初虞  
褚輩變其法乃不合而合右軍父子殆似復生此言  
大可意會蓋臨摹最易神氣難傳故也巨然學北苑  
黃子久學北苑倪迂學北苑學一北苑耳而各各不  
相似使俗人為之與臨本同若爾何能傳世也子昂  
畫雖圓筆其學北苑亦不爾

雲林山皆依側邊起勢不用兩邊合成此人所不曉近來俗子點筆便自稱米家山深可笑也元暉睥睨千古不讓右丞可容易湊泊開後人護短徑路耶

荆浩河南人自號洪谷子博雅好古以山水專門頗得趨向善為雲中山頂四面峻厚自撰山水訣一卷語人曰道子畫山水有筆而無墨項容有墨而無筆浩兼二子所長故闕仝北面事之世論荆浩山水為唐末之冠蓋有筆無墨者見落筆蹊徑而少自然有墨

無筆者去斧鑿痕而多變態

米家山謂之士夫畫元人有畫論一卷專辨米海岳高房山異同余頗有慨其語

迂翁畫在勝國時可稱逸品昔人以逸品置神品之上歷代唯張志和盧鴻可無愧色宋人中米襄陽在蹊逕之外餘皆從陶鑄而來元之能者雖多然承稟宋法稍加蕭散耳吳仲圭大有神氣黃子久特妙風格王叔明奄有前規而三家皆有縱橫習氣獨雲林古

淡天然米癡後一人而已

趙榮祿枯樹法郭熙李成不知實從飛白結字中來也  
文君眉峰點黛不知從董雙成遠山蛾帶來也知此  
省畫法

古人遠矣曹不興吳道子近世人耳猶不復見一筆況  
顧陸之徒其可得見之哉是故論畫當以目見者為  
準若遠指古人曰此顧也此陸也不獨欺人寔自欺  
耳故言山水則當以李成范寬花果則趙昌王友花

竹翎毛則徐熙黃筌崔順之馬則韓幹伯時牛則厲  
范二道士仙佛則孫太古神怪則石恪猫犬則何尊  
師周炤得此數家已稱竒妙士大夫家或有收其妙  
迹者便已千金矣何必遠求太古之上耳目之所不  
及者哉

范寬山川渾厚有河朔氣象瑞雪滿山動有千里之遠  
寒林孤秀挺然自立物態嚴凝儼然三冬在目

營丘作山水危峰奮起蔚然天成喬木倚磴下自成陰

軒暢閒雅悠然遠眺道路深窈儼若深居用墨頗濃而皴斲分曉凝坐觀之雲烟忽生澄江萬里神變萬狀予嘗見一雙幅每對之不知身在千巘萬壑中趙集賢畫為元人冠冕獨推重高彥敬如後生事名宿而倪迂題黃子久畫云雖不能夢見房山特有筆思則高尚書之品幾與吳興埒矣高乃一生學米有不及無過也

張伯雨題元鎮畫云無畫史縱橫習氣余家有六幘又

其自題獅子圖云予與趙君美長商權作獅子圖真  
得荆關遺意非王蒙輩所能夢見也其高自標置如  
此又顧謹中題倪畫云初以董源為宗及乎晚年畫  
益精詣而書法漫矣蓋倪迂書絕工緻晚年乃失之  
而聚精于畫一變古法以天真幽淡為宗要亦所謂  
漸老漸熟者若不從北苑築基不容易到耳縱橫習  
氣即黃子久未能斷幽淡兩言則趙吳興猶遜迂翁  
其胸次自別也



趙大年平遠寫湖天渺茫之景極不俗然不耐多皴雖云學維而維畫正有細皴者乃于重山疊嶂有之趙未能盡其法也

李昭道一派為趙伯駒伯驥精工之極又有士氣後人仿之者得其工不得其雅若元之丁野夫錢舜舉是已蓋五百年而有仇實父在昔文太史亟相推服太史于此一家畫不能不遜仇氏故非以賞譽增價也實父作畫時耳不聞鼓吹駢闐之聲如隔壁釵釧戒

顧其術亦近苦矣行年五十方知此一派畫殊不可  
習譬之禪定積劫方成菩薩非如董巨米三家可一  
超直入如來地也

元季四大家浙人居其三王叔明湖州人黃子久衢州  
人吳仲圭錢塘人惟倪元鎮無錫人耳江山靈氣盛  
衰故有時國朝名手僅僅戴進為武林人已有浙派  
之目不知趙吳興亦浙人苦浙派日就漸滅不當以  
甜邪俗賴者盡系之彼中也

昔人評大年畫謂得胸中萬卷書更奇又大年以宗室不得遠游每朝陵回得寫胸中丘壑不行萬里路不讀萬卷書欲作畫祖其可得乎此在吾曹勉之無望庸史矣

畫之道所謂宇宙在乎手者眼前無非生機故其人往往多壽至如刻畫細謹為造物役者乃能損壽蓋無生機也黃子久沈石田文徵仲皆大耋仇英短命趙吳興止六十餘仇與趙雖品格不同皆習者之流非

以畫為寄以畫為樂者也寄樂于畫自黃公望始開  
此門庭耳

余少學子久山水中復去而為宋人畫今間一倣子久  
亦差近之

日臨樹一二株石山土坡隨意皴染五十後大成猶未  
能作人物舟車屋宇以為一恨喜有元鎮在前為我  
護短不者百喙莫解矣

董北苑瀟湘圖 江貫道江居圖 趙大年夏山圖

黃大癡富春山圖 董北苑征商圖 雲山圖 秋

山行旅圖 郭忠恕輞川招隱圖 范寬雪山圖

輞川山居圖 趙子昂洞庭二圖 高山流水圖

李營丘着色山圖 米元章雲山圖 巨然山水圖

李將軍蜀江圖 大李將軍秋江待渡圖 宋元

人冊葉十八幅

右俱吾齋神交師友每有所如携以自隨則米家

書畫船不足羨矣

題自畫

倣米畫題

米元章作畫一正畫家謬習觀其高自標置謂無一點  
吳生習氣又云王維之跡殆如刻畫真可一笑蓋唐人  
畫法至宋乃暢至米又一變耳余雅不學米畫恐流入  
率易茲一戲仿之猶不敢失董巨意善學下惠頗不能  
當也

倣烟江疊嶂圖

右東坡先生題王晉卿畫晉卿亦有和歌語特奇麗東坡為再和之意當時晉卿必自畫二三本不獨為王定國藏也今皆不傳亦無復摹本在人間雖王元美所自題家藏烟江圖亦自以為與詩意無取知非真矣余從嘉禾項氏見晉卿瀛山圖筆法似李營丘而設色似思訓脫去畫史習氣惜項氏本不戒于火已歸天上晉卿跡遂同廣陵散矣今為想像其意作烟江疊嶂圖于時秋也輒臨秋景于所謂春風搖江天漠漠等語存而弗

論矣

倣米家雲山題

董北苑僧巨然都以墨流雲氣有吐吞變滅之勢米氏父子宗董巨法稍刪其繁複獨畫雲仍用李將軍鈎筆如伯駒伯驥輩欲自成一家不得隨人棄取故也因爲此圖及之

題畫贈徐道寅

余嘗見勝國時推房山鷗波居四家之右而吳興每遇



房山畫輒題品作勝語若讓伏不置者顧近代賞鑒家或不謂然此由未見高尚書真跡耳今年六月在吳門得其巨軸雲煙變滅神氣生動果非子久山樵所能夢見因與道寅為別訪之容安草堂出精素求畫畫成此圖即高家法也觀者可意想房山風規于百一乎

題畫贈陳眉公

予之游長沙也往返五千里雖江山暎發蕩滌塵土而落日空林長風駭浪感行路之艱犯垂堂之戒者數矣

古有風不出雨不出三十年不蓄雨具者彼何人哉先是予之遊樵李也為圖崐山讀書小景尋為人奪去及是重仿巨然筆意以志予慕余亦且倒衣從之不作波民老也

題董北苑畫

朔日至金閭門客以北苑畫授予雲烟變滅草木鬱葱真駭心動目之觀乃知米氏父子深得其意余家有虎兒大姚村圖政復相類不師北苑烏能夢見南宮耶

倣惠崇題

惠崇巨然皆高僧逃畫禪者惠以艷冶巨然平澹各有  
所入而巨然超矣因倣惠崇及之

題畫

老鶴眠堦初露下高梧滿地忽霜黃余曾作此景以貽  
仲醇矣清臣復強余為之覺與前幅較勝一籌耳

題自畫小景

趙令穰伯駒承旨三家合并雖妍而不甜董源巨然米

芾高克恭四家合并雖縱而有法兩家法門如鳥雙翼  
吾將老焉

又

陳道醇有宋刻書苑携至煙雨樓予讀次輒有省畫法  
為寫癡翁筆意

又

此畫余做大癡得無余亦癡絕否

臨巨然畫題右

上元後三日友人以巨然松陰論古圖售于余者余懸  
之畫禪室合樂以享同觀者復秉燭掃二圖厥明以示  
客客曰君叅巨公禪幾于一宿覺矣

倣三趙畫題石

余家有趙伯駒春山讀書圖趙大年江鄉清夏圖今年  
長至項晦甫以子昂鵲華秋色卷見貽余兼採三趙筆  
意為此圖然趙吳興已兼二子余所學則吳興為多也

題張清臣集扇面冊

余所畫扇頭小景無慮百數皆一時酬應之筆趙子輩亦有仿為之者往往亂真清臣此冊結集多種皆出余手且或善者庶足供吟賞人人如此具眼余可不辨矣

題鶴林春社圖贈唐公有

家有獨鶴忽迷所如人失人得已類楚弓自去自來莫期梁燕已乃于唐公之牆復躡羽人之跡整翮返駕引吭長鳴似深惜別之情聊作思歸之曲嗚呼雀羅間若鷗盟眈眈顧此仙禽真吾德友驚蓬超忽仍聯支遁之

卷二  
交珠樹玲瓏不逐浮丘之路雖云合有冥數亦由去無  
遐心自此可以暫游萬里等狎雞羣守養千齡無虞鳥  
散者矣欲志黃庭之報遂寫青田之真載綴短章用存  
嘉話

題橫雲秋霽圖與朱敬韜

此倣倪高士筆也雲林畫法大都樹木似營丘寒林山  
石宗闢全叅以北苑而各有變局學古人不能變便是  
籬堵間物去之轉遠乃由絕似耳橫雲山吾郡名勝本

陸士龍故居今敬韜構草舍其下敬韜韵致書畫皆類  
倪高士故余用倪法作圖贈之

書小赤壁并題

吾郡九峰之間有小赤壁余頃過齊安至赤壁其高僅  
數仞廣容兩亭耳吾郡赤壁乃三四倍之山靈負屈莫  
為解嘲昔齊安名人鹵莽如是因畫赤壁一正向來之  
謬然予以是并疑吾郡有小岷山未知去抵鵲村路幾  
許使余得鑿空游之或亦如小赤壁不須多遜也



雲海三神山圖

李思訓寫海外山董源寫江南山米元暉寫南徐山李  
唐寫中州山馬遠夏圭寫錢塘山趙吳興寫雪苔山黃  
子久寫海虞山若夫方壺蓬閭必有羽人傳照余以意  
為之未知似否

江山秋思圖

余與平原程黃門以使事過江南一日閣輿道上陂陀  
迴複峰巒孤秀下有平湖碧澄萬頃湖之外長江吞山

征帆點點與鳥俱沒黃門曰此何山也余曰其齊山乎  
蓋以江涵秋影句測之果然

雲林圖

元季四大家獨倪雲林品格尤超蚤年學董源晚乃自  
成一家以簡淡為之余嘗見其自題獅子林圖曰此卷  
深得荆關遺意非王蒙諸人所夢見也其高自標許如  
此豈意三百年後有余旦暮遇之乎

濠梁秋思圖

金匱要略卷二  
城隅綠水明秋日海上青山隔暮雲吾郡龍潭夜泛身  
在太白詩中不作柴桑濠濮間想語矣

煙江疊嶂圖

雲山不始于米元章蓋自唐時王洽潑墨便已有其意  
董北苑好作煙景煙雲變沒即米畫也余于米芾瀟湘  
白雲圖悟墨戲三昧故以寫楚山

題天池石壁圖

畫家初以古人為師後以造物為師吾見黃子久天池

圖皆贗本昨年游吳中山策筇石壁下快心洞目狂叫  
曰黃石公同游者不測余曰今日遇吾師耳

幽亭秀木圖

幽亭秀木古人嘗繪圖世無解其意者余為下註脚曰  
亭下無俗物謂之幽木不臃腫經霜變紅黃者謂之秀  
昌黎云坐茂樹以終日當作嘉樹則四時皆宜霜松雪  
竹雖凝寒亦自堪對

孤烟遠村圖

山下孤烟遠村天邊獨樹高原非右丞工于畫道不能  
得此語米元暉猶謂右丞畫如刻畫故余以米家山寫  
其詩

倣叔明畫題

王叔明畫從趙文敏風韻中來故酷似其舅又汎濫唐  
宋諸名家而以董源王維為宗故其縱逸多姿又往往  
出文敏規格之外若使叔明專門師文敏未必不為文  
敏所掩也因畫叔明筆意及之

題畫贈俞君寶

俞君寶將遊武夷索余此圖若有好事者能為君寶生  
兩翼便以贈之畫在余腕不至如子瞻斷臂也

臨郭恕先畫并題

輞川招隱圖為郭恕先筆余得之長安周生今年復于  
吳門見郭河陽臨本乃易雪景為設色山矣河陽筆力  
已自小減矧余野戰之師何敢言奪趙幟耶

寫寒林遠岫圖并題

昔人評王右丞畫以為雲峰石色迥出天機筆思縱橫  
參乎造化余未之見也往在京華聞馮開之得一圖于  
金陵走使緘書借觀既至凡三薰三沐乃長跼開卷經  
歲開之復索還一似漁郎出桃花源再往迷誤悵惘久  
之不知何時重得路也因想像為寒林遠岫圖世有見  
右丞畫者或不至河漢

題秋林圖

畫秋景惟楚客宋玉最工寥慄兮若在遠行登山臨水兮

送將歸無一語及秋而難狀之景都在語外唐人極力摹寫猶是子瞻所謂寫畫論形似作詩必此詩者耳韋蘇州落葉滿空山王右丞渡頭餘落日差足嗣響因畫秋林及之

跋仲方雲卿畫

傳稱西蜀黃筌畫兼衆體之妙名走一時而江南徐熙後出作水墨畫神氣若湧別有生意筌恐其軋已稍有瑕疵至于張僧繇畫閭立本以為虛得名固知古今相



卷二  
傾不獨文人爾爾吾郡顧仲方莫雲卿二君皆工山水  
畫仲方專門名家蓋已有歲矣雲卿一出而南北頓漸  
遂分二宗然雲卿題仲方小景目以神逸乃仲方向余  
斂衽雲卿畫不置有如其以詩詞相標譽者俯仰間見  
二君意氣可薄古人耳

題畫贈朱敬韜

宋迪侍郎燕肅尚書馬和之米元暉皆禮部侍郎此宋  
時士大夫之能畫者元時惟趙文敏高彥敬餘皆隱于

山林稱逸士今世所傳戴沈文仇頗近勝國窮而後工  
不獨詩道矣予有意為簪裾樹幟然還山以來稍有爛  
漫天真似得丘壑之助者因知時代使然不似宋世士  
大夫之昌其畫也因作秋山圖識之

楚中題畫寄眉公

武陵公署旁午日檢宋人事因寫圖而系以其詩武陵  
為五溪馬伏波所謂五溪何毒淫鳥飛不度獸不敢侵  
者至今笛聲悲怨計余去故園五千里矣頗憶作少游

何能聽車生耳哉此詩此畫于余情有當也

題谿山別業畫

自義陽至大石天池山水間探歷閱兩月都未曾作畫  
今日目青初佳梁谿有客携巨然圖見示秉興為此吳  
絹如水恨手澁不稱耳

自作小幀因題

倪黃合作予所見三幀獨楊太守家藏為最特為倣之

題畫贈君策

余既為君策作畸墅詩復作此補圖然書中剩水殘山不能盡畸墅之勝命之曰廬山讀書圖云

題山莊清夏圖

小莊清夏三商而起檢所藏法書名畫鑒閱一過極人間清曠之樂作此圖以記事

倣趙令穰村居圖

壬寅六月七日過嘉興魚江中寫所見之景却似重遊也

題倣巨然筆

元正十九日為余攬揆之辰海上客携巨然松亭雲岫圖見示真快心洞目之觀戲為倣此

松岡遠岫為何司理題

右丞田園樂有萋萋春草秋綠落落長松夏寒余採其意為此圖贈士抑兄亦聞士抑有高卧不出超然人外之意不媿右丞此語耳

又題晴嵐蕭寺

此圖為仲醇作今人士抑手仲醇曰弟子失之先生得之亦復何憾余曰陳仲子失之何第五得之不亦風流勝會乎因題數語以識歲月

做大癡畫贈朱敬韜

詩在大癡畫前畫在大癡詩後恰好百四十年翻身出世作怪此沈啓南自題畫余謬書之必有見而大笑之者壬子十月廿四

江山秋思圖

杜樊川詩時堪入畫南陵水面漫悠悠風緊雲輕欲變  
秋正是客心孤迥處誰家紅袖倚高樓陸瑾趙千里皆  
圖之余家有吳興小冊故臨于此

題畫贈何士抑

士抑兄每望余不為作畫所得余幅輒贖者余以行役  
久廢此道檢笥中舊時點染三尺山自武夷寄之

評舊畫

題曹雲西畫

吾鄉畫家元時有曹雲西張以文張子正諸人皆名筆而曹為最高與黃子久倪元鎮頡頏並重曹本師馮覲郭熙此幀則倣巨然尤異平時之作藏此以存故鄉前輩風流以文畫乃有絕肖大癡者予得之長安今合此乃雙美也

題沈石田臨倪畫

石田先生于勝國諸賢名蹟無不摹寫亦絕相似或出其上獨倪迂一種淡墨自謂難學蓋先生老筆密思于



金少川公集卷二  
元鎮若淡若疎者異趣耳獨此幀蕭散秀潤最為逼真  
亦平生得意筆也

題沈啓南畫冊

寫生與山水不能兼長惟黃要叔能之余所藏勘書圖  
學李昇金盤鵲鴿學周昉皆有奪藍之手我朝則沈啓  
南一人而已此冊寫生更勝山水間有本色然皆真虎  
也

題孫漢陽畫石卷

唐李德裕採天下怪石聚之平泉別墅遺誠後昆曰有以平泉石輕予人者非佳子弟也內一醒酒石尤珍愛之醉則踞焉今漢陽之寶七石似不少遜而石疑較勝唐詩云寒姿數片奇突兀曾作秋江秋水骨又云雪盡身還瘦雲生勢不孤此頗足以狀石

題顧仲方山水冊

米元章論畫曰紙千年而神去絹八百年而神去非篤論也神猶火也火無新故神何去來大都世近則托形

以傳世遠則托聲以傳耳曹弗興衛協輩妙迹永絕獨  
名稱至今則千載以上有耳而目之者矣薛稷之鶴曹  
霸之馬王宰之山水故擅國能即不擅國能而有甫之  
詩歌在自足千古雖謂紙素之壽壽于金石可也神安  
得去乎君畫初學馬文壁後出入黃子久王叔明倪元  
鎮吳仲圭無不肖似而世好其為子久者

題周山人畫

余少喜繪業皆從元四大家結緣後入長安與南北宋

五代以前諸家血戰正如禪僧作宣律師耳此冊橋李  
周逸之所勒欲與閣帖共傳其志良苦解脫禪固無藉  
此然學欲望見古人門庭蹊逕斯亦渡河寶筏珍重珍  
重

題趙文敏畫

子昂嘗有創為即工者題畫卷有曰予嘗畫馬未嘗畫  
羊子中強余為此不知合作否此卷特為精妙故知氣  
韵必在生知非虛也

題畫牡丹

花品從衆香國中來臨風獨笑足令姚魏氣短便有羣  
芳競妒其亦自絕

題伯玉畫冊

勝國時畫道獨盛于越中若趙吳興黃鶴山樵吳仲圭  
黃子久其尤卓然者至于今乃有浙畫之目鈍滯山川  
不少邇來又復矯而事吳裝亦文沈之賸馥耳伯玉此  
冊行筆破墨種種自超可謂剗俗之雅故當名家伯玉

寒士然從項氏兄弟遊多見項子京所藏名畫遂爾有  
得吾友某某特好之

題濟川圖卷後

邑侯濟川沈公以循良為江南冠冕鳴琴之暇好獎進  
文學知名士于是某某以感德殉知之意屬郡中名手  
共繪濟川圖贈侯余轉觀之近于唐人所賦南川秔稻  
花侵縣西嶺雲霞色滿堂者而青雀淩波與海鷗相狎  
則清溪之政似之圖名濟川以此若余當于侯應召時

寫乘長風破萬里巨浪之語為濟川境也某志之

題孫漢陽卷

右錄米元章一帖觀此知米薛相易事誠有之鉄圍叢  
譚或傳訛耳然余又于宋光祿家得米元章所畫研山  
雲根雪浪直鑿混沌吾鄉雪居先生又圖為卷可與元  
章競爽余將以米畫贈之惟欲易東臯草堂前一片烟  
霞便意足也

題漁樂圖

宋時名手如巨然李范諸公皆有漁樂圖此起于烟波釣徒張志和蓋顏魯公贈志和詩而志和自為畫此唐勝事後人蒙之多寓意漁隱耳元季尤多蓋四大家皆在江南葭茨間習知漁釣之趣故也

題畫南陵水面詩意

江南顧大中嘗于南陵追捕舫子上畫杜樊川詩意時大中未知名人莫加重後為過客竊去乃共嘆惋予曾見文徵仲畫此詩意題曰吾家有趙榮祿倣趙伯駒小



全宋文卷之八十三  
卷二  
幀畫妙絕間一摹之殊愧不似今予不復見徵仲筆去  
二趙可知矣

題畫

七夕泊舟吳閭張慕江以畫售于余有梅花道人大軸  
倣巨然水墨淋漓雲烟吞吐與巨然不復甲乙又高克  
恭雲山秋霽與謝伯誠學董源廬山觀瀑圖皆奇筆也  
題莫秋水畫

莫廷韓為宋光祿作此圖在己卯之秋時余同觀咄咄

稱賞今已二十年事矣仲文愛之護惜特甚自蘇過松  
周檢襲藏備至不忍轉入它氏手亦交誼也

題朱雲來畫

敬韜作米虎兒墨戲不減高尚書閱此欲焚吾硯

題倪雲林畫

雲林畫江東人以有無論清俗余所藏秋林圖有詩云  
雲開見山高木落知風勁亭下不逢人夕陽澹秋影其  
韵致超絕當在子久山樵之上

論畫

元時畫道最盛惟董巨獨行此外皆宗郭熙其有名者  
曹雲西唐子華姚彥卿朱澤民輩出其十不能當黃倪  
一蓋風尚使然亦由趙文敏提醒品格眼目皆正耳余  
非不好元季四家畫者直汴其源委歸之董巨亦頗為  
時人換眼丁南羽以為畫道一變

畫禪室隨筆卷二